

光緒山西通志

金石記六

記五之六

山西通志第九

卷之六

賜準出身頭品頂戴兵部侍郎兼都察院右副都御史巡撫山西提督軍務臣張煦奉

旨監修

碑碣

宋

應聖宮碑

乾德五年四月 舊在霍州中鎮廟

舊通志碑為節度判官朝議大夫檢校戶部尚書兼御

史大夫柱國賜金魚袋閻光度撰節度副使光祿大夫

檢校司空兼御史大夫上柱國清河縣開國 食邑五

百戶張仁藝書之趙城縣志碑今無考文見藝文案撰文

光度似 皆有誤

女媧廟碑銘

開寶六年十一月 今在趙城縣

志略山南西道節度使守右補闕上柱國賜緋魚袋裴麗
澤撰翰林院侍講通議大夫太子洗馬同正張仁愿書焯
案山西通志古蹟卷以此碑爲天寶六載歲次丁亥十一
月十六日勅建其陵墓卷則云媧皇陵在趙城縣東八里
宋乾德四年詔給守陵五戶長吏春秋奉祀開寶六年右
補闕裴麗澤撰廟碑銘曰平陽故都得女媧之原廟遂命
中使藏事有司揆功選異材召大匠以堅易脆去故就新
與古蹟矛盾考唐高祖及憲宗廟並建於開寶六年書者
爲張仁愿又王弇州跋周太祖碑云張仁愿書行筆殊草
草意小勝耳丹石之不能謹嚴始自李太和蓋篤於仁愿

至二米極矣則宋初另一張仁愿非唐開元時之韓公也
豈修志者偶見其名與張公同遂訛開寶為天寶歟

華池廟碑

開寶六年 今在翼城縣羊角山南峯

翼城縣志華池廟一在羊角山北峯曰華池嘉澗侯一

在南峯曰孚右大將軍宋開寶六年重修校書郎李承

翰有記樂廟祀羊角哀屬翼城北峯屬許山縣祀左伯桃

二仙館碑記

開寶七年 今在鳳臺縣山頭里

鳳臺縣志無撰書人姓氏內多別字訛樂氏為岳後書

大宋開寶七年甲戌七月壬申朔二十日丁卯為太祖

紀年記云西鄰宿鳳之臺知棲鳳之說不第李村宋幢

也

石塔記

開寶九年 今在鳳臺縣

鳳臺縣志塔記首行來蹤字一和尙字七本華州人也

幼弱苦空下多缺文可辨者七十餘字有胥臻道修業

因於十方及住持五十餘歲大宋建隆二年二月十五

度門人惠海等宗派共致哀慕安厝塔下缺師和尙施

其地末行書九年歲次丙子二月宋是年十二月太宗改元太平興國碑立

於二月爲開寶九年也

法輪寺牒

太平興國三年 今在鳳臺縣西南三十五里松嶺山

福巖寺牒

太平興國三年 今在鳳臺縣東南三十五里峽石山
鳳臺縣志太平興國二牒石刻一在松嶺寺額法輪一
在青蓮寺額福殿前俱列中書門下澤州奏準行所管
存留有無名額僧尼寺院共三十二所靈巖院宜賜法
輪青蓮寺宜賜福殿爲額勅命指揮書勒懸掛準勅故
牒太平興國三年五月二十日牒中書門下平章事左
僕射兼門下侍郎平章事右僕射兼侍郎門下平章事
錄事參軍胡推官王大理寺丞權知軍州事韋刺史齊
按牒文與眞宗景德時稍異州官不傳其名中書門下
官亦不書姓與花押或宋初體制使然考太宗三年戊
寅所謂中書平章者盧多遜右僕射爲沈倫左僕射則
薛居正也

后稷廟碑

太平興國三年 今在聞喜縣北門外

平晉記並詩賦石刻

太平興國四年 御製舊在太原縣東十里汾河曲

志略太宗平劉繼元毀太原城置平晉縣於汾東收行在
爲佛寺賜號平晉一名回鑾御製平晉記並賦及五七言
詩刻石寺中大中祥符二年改寺額爲崇聖考古晉陽城
在今縣治北里許晉刺史劉琨展築中有三城一曰大明
城董安于築北齊置大明宮其一東魏靜帝置晉陽宮隋
更名新城其一開皇十六年築名倉城唐爲北都有留守
貞觀十一年長史李勣於汾河東築城曰東城後引晉水
架汾橋爲東隍省守陴萬人又醴汾水環城植柳固隄武

后時長史崔神慶以二城隔汾乃於其間跨水聯堞合而
一之名曰中城五代之君迭興於此復加增修益形壯麗
至宋太平興國四年太原平御城受劉繼元降議者謂宋
興歸德爲商星分野太原參星分野昔高辛氏二子不相
能故自古參商不相見國家盛則後服衰則先叛不宜列
以方鎮乃下詔毀其城改爲平晉縣以榆次爲并州徙太
原民於唐明鎮案徙唐明鎮在七年縱火焚太原廬舍老幼趨城
不及焚死者甚眾於是累朝之建置崇墉廣殿無復片瓦
之存矣

慧覺禪師石龕記

太平興國四年 今在鳳臺縣

半塘間筆在城內民家其可辨者數十字師俗姓金本貫

晉城縣尙樂缺慧覺禪師缺年缺具龕四十餘缺四月十

五日遷化缺建立建隆元年司馬廐監缺姪男文密缺監

石爲記年月日後書太平興國四年歲次庚午四月癸巳

朔四日據文義蓋慧覺和尙石龕記也考宋馬政太平興

國有天駟監天廐坊真宗乃置羣牧司後諸州皆改爲監

且多以州縣兼攝此云司廐監名是否爲姪男文密抑屬

闕文

重建湯廟碑

太平興國四年 今在聞喜縣店頭村

修晉祠碑

太平興國九年五月 舊在太原縣

太原縣志將仕郎尙書職方員外郎趙昌言奉勅撰翰

林院待詔中大夫司農少卿賜緋魚袋張仁慶奉勅書
案昌言字仲謨孝義人太平興國三年禮部試第一廷試擢甲科仕至參知政事

舍利塔斷碑

太平興國中 今在翼城縣

翼城縣志明王泰重修太平興國寺碑云寺前有毀浮
圖階下斷碑文字已不可讀惟其首云大宋新修舍利
塔碑數字尙可見今寺名乃宋所改但莫考其初爲何
名耳

靈峯寺碑

雍熙三年 陳用協撰今在虞鄉縣西南十里方山見縣
志

法輪禪院石塔記

雍正四年 今在鳳臺縣松嶺山

鳳臺縣志文前書老僧自捨衣鉢錢建造佛牙舍利石塔撰記並書云云以四六行文

慶唐觀重修功德碑

清化元年三月 舊在浮山縣

舊通志朝散大夫試大理評事張昭舉文林郎守主簿兼權知縣事黃元轍文林郎守主簿孫方制權知縣尉事李太素建鄉貢進士王千里撰雲水道士黃慶書

保甯禪院碑

清化元年 今在聞喜縣東鎮唐興寺

謹案保甯卽唐興之改名當有中書牒文未審卽是碑否

普濟院牒

至道元年 今在鳳臺縣北五十里

鳳臺縣志宋中書省牒在元泉寺澤州奏準勅賜普濟之院爲額太平興國三年五月二十五日牒中書侍郎盧左右僕射兼門下侍郎平章事俱無花押後書至道元年三月六日立石此牒與松嶺青蓮兩寺同時勅賜其中書官階獨多遜書姓與二牒稍異後云知州事推參等官姓名亦不同

棲巖寺牒

至道元年 今在永濟縣南十五里

蒲州府志寺有宋至道元年禁牒傍刻杜諤薛休題名
開元寺壇長賜紫僧重宣塔記

咸平四年 楊億撰今在蒲州府東關薰風寺巷內

謹案碑文今多剝泐僧塔本在南郭外殆後人重億
文移入寺中文收入武夷新集中有云秋官貳卿上
谷寇公早在先朝參預大政重師之行薦於帝廷詔
賜紫方袍以旌其德又自稱與上谷公道契無生心
專趣大云云上谷公卽寇萊公也

重刻絳守居園池記序

咸平中 通判孫冲撰舊在絳州見州志

文廟古柏記

咸平中 李垂撰舊在聞喜縣見司馬光聞喜宣聖廟碑

勅賜承天禪院記

景德二年 楊億撰舊在潞安府

潞安府志景德元年西京左藏庫使樊州刺史李繼昌
澶淵之役使遣定盟因奏請以潞州舊宅爲寺賜額承
天禪院楊億撰記

謹案寺久廢舊址並失所在文見武夷集末署景德
二年歲次乙巳四月八日記蓋成於捨宅次年也億
既究心禪悅而繼昌父子尤以好佛聞宜其詞之愜
當有體見推一時也國老談苑稱李遵勛宗楊億爲
文於第中築宮塑像申函文之禮遵勛卽繼昌子贊

廣鐙錄者

定國永安禪院碑

景德二年 今在汾陽縣北辛安村文模糊不易讀見汾

陽續志

峽石山彌勒殿碑

景德四年八月 今在鳳臺縣

鳳臺縣志釋題名以駢體撰記記稱唐咸通八年勅賜名額後周顯德三年勅下廢無名寺宇此刹依舊住持隨時營造并讚考五代史顯德三年十一月廢諸祠不在祀典者記爲有據矣

天慶觀碑

景德中 今在河津縣東北一里見舊通志

魏孝文帝廟碑

大中祥符元年 今在鳳臺縣南龍門峽

鳳臺縣志宋重修魏孝文帝廟碑彭城劉滔文并書篆碑後皇宋三葉嗣位之，有四載景德四年厥功告畢明

年正月天書降改爲大中祥符元年據碑云始建於魏
唐咸通中重修至季漢乾佑末年復行增葺中敘孝文
本紀多別字書法甚劣所稱改元年月與宋史合考魏
孝文紀太和二十一年丙巡自平陽趨龍門非此龍門
也惟明帝七年南巡出二天井關八年北登太行山幸高
都魏代多惠澤及民而孝文尤著廟而祀之宜矣又河
底北坡亦有祠古樹深潭像製甚古碑剝蝕不詳所始
太宗書庫碑

大中祥符四年 御書今在太原府城打鐘寺

曝書亭集右宋太宗皇帝書庫碑大中祥符四年真宗御
書勒石在太原府壽甯教寺碑爲風雨崩剝其半沒土中
歲久盡蝕文凡二千餘言僅存數百字其陰石尤泐所可

識者有太宗御製文集四十卷又集一十卷怡懷詩一卷
回文詩一卷消遙錄一卷至理勤懷一卷宋志載御製集
一百二十卷蓋統言之也其勢圖琴譜各二卷蓮花心漏
回文圖若干卷雜書扇子一百三十六柄雜學簇子七百
五十三軸按史帝旣削平諸國下詔搆遺書於左昇龍北
建崇文院徙三館書實之此崇文總目所自始也又分三
館書萬餘卷別爲書庫所謂祕閣是也王明清有言太平
興國中諸降王死其舊臣或宣怨言太宗盡收用之置之
館閣使修羣書廣其卷帙厚其廩祿贍給以役其心俾卒
老於文字則帝之留意翰墨特出於權謀祕計而非性所
好也雖然亡國之臣世主往往輕視之如土芥而重繩之
以刀鋸帝獨容之禁侍之列給筆札事纂述謂非世主之

所難能歟嗚呼是可記也

祀汾陰壇頌

大中祥符四年 舊在滎河縣

弇州續纂漢武帝封泰山還祀汾陰何所取義而唐元朱
眞皆因之良可笑也頌爲王文貞公旦撰亦天書之緒餘
耳尹熙古者書院待詔差有聖教筆而不能免通微院體
聊爲志之

志略燁按碑在后土廟太甯殿後尙完好乙丑夏以事至
滎河遊雁上見大河橫衝其下所謂掃地壇秋風樓俱已
崩沒不存崖高數十丈已崩至碑後僅數尺耳因謀聚土
人遷碑他所以石過高大而危崖嶽巖艱於施力而止今
又數年未知尙存否也

汾陰朝覲壇頌

大中祥符四年 王欽若撰舊在榮河縣

榮河縣志朝覲壇宋祀汾陰築在故后土廟側

二聖配享碑銘

大中祥符四年 御製今在榮河縣

榮河縣志在城內察院東俗稱蕭牆高丈餘廣三丈碑

石光澤堅厚上鑄二聖配享銘覆以垂簷斗拱二聖宋

太祖太宗也

成湯廟碑銘

大中祥符四年 正書舊在榮河縣

志略殿中侍御史李瑩撰在后土廟後湯廟

中都寺碑

大中祥符四年 今在平遙縣西

謹案中都寺今名雙林寺近在城外而碑爲康氏太
乙所未采及殘泐之餘惟寺名年號稍可辨識

廣孝泉記

大中祥符五年 今在蒲州府

志略烽按舜井在舜廟後東西二井太平御覽舜爲父浚
井取金銀置籬中與父母皇甫諡曰河東有舜井也宋眞
宗祀汾陰幸之下詔曰朕以巡省蒲坂歷覽舜泉欽孝德
以升聞考遺蹟而尙在宜加表稱用表敦風乃賜名曰廣
孝泉復汲泉水徧頒著位大中祥符五年命王欽若撰記
明張四維跋碑後云眞宗謁舜廟名雙井曰廣孝泉命樞
臣王欽若作記镌碑廟中嘉靖乙卯地震碑泐不可復豎

萬曆癸未河東道王基令判官嚴汝聘別舊一石錄碑文
鐫暨原所

薰風樓記

大中祥符五年 舊在蒲州府

志略樓在城內唐廣明中王重榮建舊名克復樓眞宗幸
蒲以舜故都更名陳堯叟撰記

東嶽廟碑

大中祥符五年 王鼎撰正書今在定襄縣見縣志

陳堯佐劄子石刻

大中祥符八年 行書今在鳳臺縣天井關

鳳臺縣志在天井關文廟內前書河東轉運使陳缺劄

子奏行書甚工必文惠筆也大意言平治太行險道以

便綱運剝落數字後書大中祥符八年十二月十四日
蓋真宗乙卯也考文惠本傳不載此劄惟稱其奏除河
東石炭稅減澤州鐵冶課三十萬又奏免毀唐賢臣墓
碑碣以起浮圖勅州縣完護卽此見公之深情愛古後
有重其金石遺蹟者或亦有同心也

太岳廟碑銘

至道元年 今在聞喜縣西宋村

謹案碑前書大宋國解州聞喜縣新建太岳廟碑銘
并序前攝鎮安軍節度使推官鄉貢進士張待問撰
眉州昌福禪院僧守則書并篆額末云至道元年歲
次乙未十月甲戌朔十五日戊子建耳文駢儷多摯
符籙家語守真行書殊道緊

寶雲寺碑

天禧三年 今在長治縣南五十里內王村

長治縣志碑前書上黨縣潛龍山寶雲寺記後書大宋
天禧三年歲次己未四月戊子朔八日乙未記前代州
軍事推官將仕郎試祕書省校書郎張儀鳳撰寺主沙
門守通書碑稱寺名華嚴禪院唐乾符中僧明惠大師
諱文舉居之當時有府公李瑣尙書聞師高行請居止
延慶禪寺其門人如惲於天佑十四年爲上黨縣令請
任此山其後宰官王鋌復舊地基於太平興國三年勅
賜寶雲寺額云云

后土祠碑

天禧四年五月 裴瑾撰今在萬泉縣見縣志

資聖寺牒

天禧四年 今在鳳臺縣大陽鎮

鳳臺縣志宋中書省牒在大陽永建寺具呈累代修崇未詣名額蒙中書門下牒資聖寺澤州晉城縣古永建寺牒奏勅宣賜資聖寺爲額牒至準勅故牒天禧四年正月日牒禮部侍郎參知政事李_押右僕射兼中書侍郎平章事_押左僕射兼中書侍郎平章事_押考眞宗天禧四年庚申牒所云參知政事李者李迪左僕射爲王欽若右僕射爲向敏中平章獨不書姓與國初異

彤骸閣舊址斷碑

天禧中 舊在太原府西門外

舊通志天禧中陳堯佐知并州因汾水屢漲卽東岸爲

隄周五里引汾水注之植柳萬株建形復閣於隄上每歲上巳太守泛舟郡人遊觀焉卽今所謂柳溪是也閣久圯於水斷碑尙存

岱岳廟碑

乾興元年 篆書今在聞喜縣西宋村

謹案碑末云有宋六十三祀月建申中之五日子乃拱集而誌太山山人張析文兼書其篆多採之碧落碑故紀年亦用彼法宋以庚申開國至眞宗天禧四年再逢庚申又二年壬戌得六十三年是歲改元乾興僅一年也

太清觀碑

天聖二年 舊在霍州

霍州志觀在城西一里天聖初道士陶崇仁建有碑記
澤州龍堂記

天聖七年七月 今在鳳臺縣

鳳臺縣志安國軍節度使掌書記試大理評事推官夏
侯觀撰書試大理評事王若谷篆額記稱唐刺史溫璠
因歲旱開鑿古龍泉致禱而雨澍遂建祠載於祀典當
時去府未遠必有所據今唐碑已漫滅無考

翼城文廟碑

天聖八年 文彥博撰今在翼城縣

玉兔寺碑銘

天聖八年五月 今在浮山縣

舊通志太原安石撰文當寺修造主持東京右街講諭

大德玉應立石

玉免寺詩碣

天聖八年十月 今在浮山縣

舊通志七言律一首尙書刑部郎中直史館賜紫金魚袋康孝基題寺僧志應勒石

天聖宮廟應詩碣

天聖九年閏十月 今在浮山縣

舊通志新授江南東路諸州水陸計度轉運使兼提點鑄錢等公事本路勸農使朝請大夫行尙書虞部員外郎上柱國賜紫金魚袋王惟正留題都監賜紫 闕道士段見素立碑

疑真觀萬壽宮碑

天聖九年 今在聞喜縣西關

杖華堂碑

天聖中 舊在太原府

志略見天下金石志山西通志云宋韓絳韓竊相繼守太原建杖華堂於城西柳溪隄上有芙蓉洲四照亭水心亭誌勝李清臣作碑記之

龍武將軍薛陸墓碑

天聖中 歐陽修撰今在絳州周村

留題玉兔寺石刻

明道二年八月 今在浮山縣

舊通志朝請郎守尙書度支員外郎充集賢校理知解州軍寧州兼管內勸農提點兩池事輕車都尉賜緋魚袋張

仲尹題有小序詩五言律十韻寺僧志慮立石

集善別詳補遺

贈尚書虞部員外郎文統墓誌銘

明道中 今在靈石縣

志略路公文彥博撰在孝義原按路公永福寺藏經記云
高僧祖墳在汾州介休二縣父母墳在西京伊闕縣皆所
在有奉墳僧得賜額曰永福教忠積慶得撥放童行內介
休空王院西京資聖院乃因舊院已各有藏經惟永福教
忠院近特捨俸賜金帛各置經一大藏付逐院收掌云云
謹案志稱府君諱統字挺之本姓敬當晉室以犯高
祖御名改賜今姓取文象也至聖朝以避異祖廟諱
遂不復舊又稱府君烈考崇遠與晉高祖有豐沛之
舊天福初以協贊之功昇出宰之任授代州崞縣令

稍遷并州太谷令則改姓卽始於崇遠當時實出特
賜也世言文苟二姓皆自敬分不知宋以前文氏如
文翁文顯苟氏如苟變苟諫之類久爲著族固不盡
敬氏所改且敬所從之苟本音亟古文作著古文文本音模古文
支雖訛俗相沿久失古義然据潞公自述義取文象
偏旁分姓之說恐不足信也

玉兔寺留題詩碣

景祐三年九月 今在浮山縣

舊通志推忠佐理功臣金紫光祿大夫行尙書吏部侍郎
知樞密院事上柱國王隨題七言絕二首當寺修造主講
經論沙門志應立石

參知政事諡簡肅薛奎墓誌銘

景祐五年 歐陽修撰舊在絳州周村

護國寺碑

寶元二年 今在孝義縣東盧家莊

孝義縣志寺為天禧二年僧筠重修傳從政撰文寶元

己卯七月庚寅朔十九日戊申建

惠煦禪師塔銘

康定元年五月 今在文水縣上堂村崇勝寺見縣志

謹案舊通志有勅建崇勝寺碑康定元年五月初七

日立石與此碑建立月日悉同當是一碑緣惠煦葬

於天聖三年至是年始建塔志誤以建塔為建寺也

天章閣待制司馬池墓碑

慶曆二年 舊在夏縣西三十里鳴條岡

舊通志司馬溫公之父也龐莊敏公藉撰云日光護殿
歸於故鄉葬於涑水南原之晁村以從先塋

興國寺舍利和尚塔銘

慶歷四年 今在定襄縣

定襄縣志寺在橫山宋慶歷初一僧來主寺明年化去
得舍利數粒鄉人號曰舍利和尚爲建塔立碑

麓臺山聖俱寺殘碑

有陰並則

慶歷六年 今在平遙縣

汾州府志碑高丈餘闊四尺餘字方二寸其款勒可見
者一曰朝奉郎中祕書省著作佐郎知并州太谷一曰
朝奉郎太常博士通判石州軍州兼管等字後有慶歷
六年五月二十二日十字在縣東十五里冀郭村慈相

寺寺舊名聖俱寺慶歷間建塔高三百餘丈又名麓鏡臺

平遙縣志碑側北崇甯人題名字如碗大側南上建中癸未人題名下政和乙未人題名皆大字碑陰上景祐二年祕書丞署并州判官吳郡張伯玉書字體肥圓亦饒秀意贊無名禪師語也下皇祐二年記沙門百餘人

永福寺藏經碑

慶歷八年 今在孝義縣

汾州府志縣南二十縣董屯村有文氏先塋文潞公曾祖周國公夫人郭氏霍氏武氏墓在焉旁有永福寺舊名廣法慶歷八年潞公奉勅改今名守文氏先塋自記
句注神祠禱雨記

慶厯中 張元撰舊在代州西北四十里太和嶺

志略王崇極順應侯廟記云慶厯郡守張元退夫以禱神之應爲記鐫石置前廳之壁季夏營葺忽若雨露霑灑光瑩洞徹闔廟眾工咸歎其異云

后土廟碑

慶厯中 今在開喜縣郭家莊

淵德侯廟碑

皇祐元年 今在垣曲縣西二十里上塏坂

謹案碑爲原州推官將仕郎試祕書省校書郎焦庭堅撰據碑云禹貢析城山在河東濩澤之西中有池而枯涸者老所傳素多靈異又云聖王廟圖籍載之蓋本以祀湯慶厯六年以禱雨加爵號遂爲池神之

祠皇祐初縣令朱皓重修之耳

鄉甯重建文廟碑

皇祐三年 知縣劉舒撰今存

謹案記稱鄉甯慈之古邑以附河水患公私務改邑
爲訴皇祐三年始遂其請尋卜鄂侯故壘而遷置焉
舒是歲被命理茲邑授署越三日恭謁先聖之故祠
云云鄂侯故城括地志在慈州昌甯縣東北二里又
地形志定陽郡昌甯延興四年置有陰陽二城城分
陰陽必相距不遠蓋夾鄂谷水而置塘隍者今縣西
一里有村聚枕北山下縣當卽所謂陽城也其南
濱河多園圃當卽所謂陰城括地志言鄂侯城在縣
東北此記亦言附河水患改邑然則由北魏以訖於

宋初縣皆治陰城無疑矣昌甯後唐避李因昌諱改鄉甯顧亭林云今官府到任謁廟入學始於何武據碑則謁廟在任官三日後蓋宋時尙無定制也

端州刺史安樂郡開國侯孫繼勳墓碑有陰

皇祐四年 今在虞鄉縣

虞鄉縣志在縣西十里郭村西南有巨碑翰林學士孫

抃撰文字剝落不可卒讀案文略云繼勳字元嗣金陵

宗授左班殿直果官至左藏庫使繼勳年十九以開調

補三班奉職授闕門祇候知保安軍曹瑋帥西府舉為

郎延路兵馬都護運端州防禦使龍神衛四廂都指揮

使涇原儀渭州鎮戎軍馬步軍副都部署轉步軍都尉

侯封開國侯食邑千八百戶實封二百戶賜刻衛碑陰

王仲芳墓誌

河東劉致撰吳興趙孟頫書案碑陰為追表孫氏世系

皇祐五年 今在榆次縣郭社村

謹案誌爲縣人冀膺撰文略云王氏居太原自唐至五代世爲著姓太平興國四年太宗平劉氏遷其人於京輔府君暨余大父偕占籍曹南後詔遷新榆次以保之府君遂居焉云云案鐵圍山叢談稱太祖親征劉繼鈞班師之際盡徙忻代之民於內地六百里一無人煙太宗繼伐因一舉而破宋史則云太原平毀其城改爲平晉縣以榆次爲并州無徙民京輔事惟元遺山過晉陽故城書事云至今父老哭向天死恨河南往來苦與此文所占籍曹南後詔遷新榆次合新榆次蓋卽新立之并州也夫太祖之俘蹙民人猶曰敵也若太宗則地皆其土而焚其廬舍蕩其

家室又何其不宏宜夫平晉既立井人至七十餘年
不入新城也文稱仲芳始學書數於鄉先生胡公數
年究極其藝胡公當是胡賓王撰劉氏興亡錄仲芳
孫惟簡因西鄙用兵請出家財朝廷授試將作監生
簿輸粟助邊漢已行之至宋幾爲故常然猶虛爵也

井州新修廟學碑

至和元年 韓琦撰舊在太原府

志略碑文云太平興國四年太宗皇帝平偽劉一天下壤
太原古城徙州榆次又三年復遷於唐明鎮當時經略者
乘用武之後慮不及遠不知井據都會異日爲一道之本
凡城隍官府門戶衙陌之制一從苟簡不中程度視夫子
廟尤爲不急置城之東南隅體陋而削僅有祠所云云案

今會城即唐明鎮地當日城甚隘小偏於西南至洪武中
展築東南北三面而城始大廟金季燬於火始移建今縣
治西而所謂城之東南隅者今不能確指其處矣

聞喜縣宣聖廟碑

至和二年 司馬光撰今存文見通志

司空表聖隱居記

至和三年 今在虞鄉縣王官谷

舊通志虞鄉縣令樂沅即休休亭故址重構刻記於上

並構堂設表聖像祀之

魏文侯墓碑

嘉祐三年 謝景初撰舊在孝義縣

詳見唐開元碑

贈中書令武襄公狄青墓碑

嘉祐四年二月 今在汾陽縣

汾陽縣志在縣北十里郝洪里劉村翰林學士王珪奉
詔撰文

汾州別立桂林摩崖碑記

嘉祐五年九月 今在汾陽縣

汾陽縣志狄青墓神道碑右側爲摩崖記序碑嘉祐五
年朝奉郎尙書屯田員外郎通判汾州兼管內勸農事
輕車都尉賜緋魚袋謝景初撰蓋武襄平儂氏蠻時余
靖以經略安撫使在行卽桂林之崖刻石紀功歸葬西
河之二年公子西上闔門使復摹余靖桂林摩崖碑別
立於墓旁奉親顯慶寺而景初爲之序今所立摩崖碑
久佚序文僅存不知何時移置墓域也

贈尚書都官郎中司馬沂墓表

嘉祐五年十一月 王安石撰雷簡夫書今在夏縣

志略煒按沂為溫公之從父溫公敘其事蹟求安石撰表

後荆公集不載此篇乃蔡京蔡卞馮澥之徒刪之故也至

慎文忠公始表而出焉始安石以議新法與溫公不合猶

未甚水火也至京卞之徒出借紹述之名為營私之計措

擊諸賢極力抵誣惡溫公而並去沂之墓碑禁黨人而並

禁蘇黃之文字凶候狂張禱及數世而國亦隨之使安石

有知當亦痛心疾首而非其變法之本意也案碑前題銜

刑部員外郎知制誥權修起居注糾察在京刑獄上騎都

尉賜紫金魚袋王安石撰朝奉郎尚書都官員外郎知

州兼同羣牧及管內勸農事賜緋魚袋借紫雷簡夫書後

繁朝奉郎尚書屯田員外郎知國子監書學權同判吏部

南曹上騎都尉賜緋魚袋楊南仲篆額簡夫書純用柳法

南仲博通古翰皆一時選也末行前有布衣曹知白模刻

六字別一人書。歷數百年石本鋒銳如新。故是高手。惜碑趾剝落尺許。失去三十餘字耳。

涼軒詩碣

嘉祐六年 今在芮城縣

芮城縣志涼軒在縣治內。宋嘉祐間縣令吳戴建河南李實記作詩者杜叔獻樊宗簡呂希彥趙中逵黃通耶几趙缺柳說張諤陳庸陳規李實李鵬張允王稔王辟疆江詠李古並戴爲十九人。嘉祐六年辛丑八月戴立石並題額。男進士柬之書。

重廣水利碑

嘉祐八年二月 今在太原縣晉祠

志略陳知白知平晉疏晉祠水十分之灌民田。增於舊二百二十一夫。碾磴之具一十二區。太谷令公乘良弼撰記。

山西通志卷九十四
金石記
知白文惠公堯佐之孫也

顯慶寺碑

嘉祐八年 今在平遙縣南岳壁村

梵業寺碑

嘉祐八年 今在平遙縣西二十里西泉村

百福寺牒

嘉祐八年 今在平遙縣超山

平遙縣志百福寺牒尙書門下奉勅賜額中有戶部侍郎參知政事趙戶部侍郎參知政事歐陽中書侍郎兼禮部尙書平章事會門下侍郎兼兵部尙書平章事韓國子博士薛良孺墓碑

嘉祐八年 歐陽修撰舊在絳州周村

內殿押班薛塾墓碑

嘉祐八年 歐陽修撰舊在絳州周村

謹案歐陽公所撰薛氏諸碑據州志今惟龍武將軍薛睦碑存然亦剝泐並名字殘缺矣餘碑之見於文集及舊志者惟薛塾碑年月無考茲於良孺碑並列之嘉祐中良孺簡肅公從子睦公之兄塾其弟也

梁令祠碑

治平元年閏五月 薛長孺撰今在絳州鼓堆村見州志

詳見隋臨汾令梁軌碑

大覺寺牒

治平元年 今在長子縣西北五里寺頭村

長子縣志大覺寺石刻宋治平賜勅帖署平章歐會趙

韓諸公姓氏寺僧寶之嵌殿外西壁字微剝蝕點畫猶可摹臨

真如禪院牒

治平元年 今在潞城縣南垂鎮

潞城縣志碑額書敕賜真如禪院六字牒文云中書門下牒潞州潞城奏準勘會到繫關存留寺院乞賜名額候勅旨取到祠部狀並繫得文關內潞城縣金粟山福仙寺宜賜真如院牒奉勅如前宜令本縣翻錄勅黃降付逐寺院依今來勅命所定名額牒至準勅故牒治平元年閏五月日牒戶部侍郎參知政事趙兵部侍郎參知政事歐陽中書侍郎兼禮部尚書平章事會門下侍郎兼兵部尚書平章事韓案牒內列銜爲韓琦會公亮

歐陽修趙概時英宗卽位之初諸老並聚一廷爲有宋
盛時

清虛觀牒

治平元年 今在平遙縣城見舊通志

鹿苑寺碑

治平二年 今在洪洞縣

洪洞縣志在縣東南內鼻村卽福巖寺有王荆公安石
撰文

慈廣寺碑

治平二年 張畢記在屯留縣東北二十里石聚山見縣
志

太常少卿司馬旦墓誌銘

治平二年 今在夏縣涑水南原

夏縣志在天章閣待制司馬池墓側溫公兄也公撰誌
壽聖寺牒

治平四年 今在陽城縣西北四十里

陽城縣志宋初改寺爲泗州院天禧間僧法澄等重建
治平四年賜額壽聖下澤州錄勅付本院有中書門下
平章事王曾牒文碑

柏谷寺詩碣

治平四年 今在長治縣東北十里

長治縣志行書前書閣三月二日陪行之祕監遊柏谷
寺都轉運使右諫議大夫充天章閣待制吳中復詩七
律一首又祕書監知軍府事陳述古次韻一首末題治

平丁未望日立石陳知遜書

聖壽院碑

治平四年 今在平遙縣西北四十里甯固村

贈尙書比部郎中司馬諮墓表

熙甯三年十月 司馬光撰今在夏縣涑水南原見縣志

靜軒記

熙甯三年 范鉞撰舊在壺關縣署見縣志

天聖宮事蹟碑

熙甯四年 孫景文撰今在浮山縣

浮山縣志天聖五年四月詔改慶唐觀爲天聖宮熙甯

辛亥立石

御製祭狄武襄公文

熙甯六年 狄諮立今在汾陽縣

汾陽縣志狄武襄墓神道碑左側有熙甯元年神宗御祭文碑凡兩層上列祭文下方記遣使祭墓事翰林學士尚書兵部員外郎知制誥鄭獬序右諫議大夫充集賢院學士史館修撰宗正寺修玉牒官宋敏求書宋周輝清波雜志熙甯改元青子諮入對上問青有遺書否乃上平蠻記歸仁鋪戰陣二圖上乃自爲文卽其第祭之李心傳朝野雜記神宗祭狄青文中丞滕達道所作

玉皇廟碑 有陰

熙甯九年 今在澤州府城

鳳臺縣志澤州教授李安時記覃懷進士蘇孝恪篆額進士馬同書其同立石者則進士秦谷等也文字俱惡

劣而篆煩峭勁碑陰題名後列十三社今猶古名府城
二指揮司宣押司官司清焦家社鄉貢進士胡知柔漳
東南社鄉貢進士劉發義勇第二副指揮使韓坦考義
勇為十餘營之一押司又指揮十將之一也黃頭去水
北劉宗嗣漳東南劉紀供書大理寺丞孫
必其祖會居是官借以為榮然不可考矣

天甯寺雙塔記

熙甯中 今在平定州

平定州志在下城南營寺宋熙甯間建賜名天甯萬壽
禪林蔡京書額內雙塔對峙高十餘丈西染院使知平
定州軍事高權有雙塔記石刻

贈左屯衛大將軍李興墓碑

熙甯中 王安石撰今在永濟縣

志略墓在陶邑鄉仙觀里紫金山北興以偏裨於真宗咸

平二年與契丹戰死其子樞積官至賀州團練使新荆公撰碑碑云以嘉祐六年與夫人朱氏合葬而縣志書荆公結銜為參政則石立於熙甯間矣

王禹偁五老峯詩碣

元豐二年二月 今在虞鄉縣

虞鄉縣志舊碣在靈峯寺

案詩為醴化中禹偁講官元解州時作凡五古二首

豐時禹偁會孫汾守蒲州因原碣剝落刻石於王官谷

又有張維記二公重刻二詩序

賜太師文彥博詩勅并序石刻

元豐三年 今在汾陽縣學宮

汾陽縣志治南百步淨心寺相傳為文潞公宅遺址嘉祐八年建寺明嘉靖三年憲使王崇慶改建察院因移

詩勅碑於學宮

漢壽亭侯廟碑

元豐三年 李漢傑撰今在沁州

謹案碑稱銅川神虎軍任眞等二百三十七人從征交趾至荔浦禱於神進軍富良江與賊戰大捷策勳爵賞者二十六人歸而建廟考宋史熙甯八年交趾入寇陷欽廉九年陷邕州郭遵敗之富良江復諸州碑所云進軍富良江蠻酋遣將爭岸迎戰神虎軍鼓譟先登強擊雨射賊大奔潰皆與史合神虎軍者河東諸州兵舊立神虎營十指揮熙甯中撥充禁軍上親閱所教排手詔殿前諸司步軍指揮教如河東法亦可見當時州兵訓練之精矣

祚德三侯廟勅封碑

元豐四年 舊在太平縣南二十五里

舊通志元豐四年七月詔封晉程嬰成信侯公縣杵臼

忠智侯賜勅建祠崇甯三年又封韓厥為義成侯皆報

其存趙孤也案明王懿復碑記云廟有元豐崇甯二碑存焉今崇甯勅詞不傳元豐勅略云自昔

有功於世者罔不廟食况國家肯綮之所出嬰杵臼有立孤續絕之德而常祀不載真為闕典朕命使者訪其

墓得之於絳宜卽建祠並封侯爵云云

法興寺佛殿碑

元豐四年正月 王益柔撰今在長子縣慈林山見縣志

普光寺呂惠卿書刻石

元豐六年 今在太原府七府營

舊通志河東安撫使呂惠卿為僧求迦葉書偈刻石寺

中今尙存

伏牛山靈顯公廟碑

元豐六年 康濟撰今在沁州北三十里

成湯廟碑

元豐七年 趙執中撰今在陵川縣東十里

崇聖寺碑銘

元豐八年 舊在太原縣東十里

舊通志并州宣撫使韓絳撰明宏治十四年七月碑吼

三日夜一夕汾水漲沒志略寺即平晉寺也大中祥符

容於資聖院統平殿以太宗降劉繼元是太平之統也

故取為殿名嘉祐元年殿災詔復加崇建諫官范鎮言

并州素無火災自建神御殿未幾而輒焚天意若曰祖

宗御容非郡國所宜奉安者近聞下并州復加崇建是

徒事土木重困民力非所以答天意也自并州平七十

七年故城父老不入新城宜寬其賦輸緩其徭役以除

山西通志卷九十四 金石記六

七

其忠使河東之民不忘太宗之德則陛下孝思豈特建
一神御殿比哉疏人不知熙甯初汾水溢寺毀元豐二
年詔重建殿堂樓閣三百六十餘楹左右淨房十區以
處僧眾後壤垣爲館舍數十區以待使客外築防以杜
水患詔韓
絳撰記

三聖堂銘

元豐八年八月 呂惠卿撰今在太原縣龍山明仙寺見

縣志

惠明寺舍利塔碑

元豐八年 呂惠卿撰并書今在太原縣北二里淨明寺
曝書亭集呂惠卿愴人也當時君子視若鬼域而王安石
獨仕之不疑且曰惠卿之賢雖前世儒者未易比也今觀
惠明寺舍利塔碑雖能文善書之士無以過之世徒知其
頭會箕斂之才不知兩人當日以經術定交而取合於文

字也嗚呼此其所以爲姦也歟

金石萃編按此碑撰者呂惠卿宋史姦臣傳惠卿累以資政殿學士知延州丁母憂元豐元年加大學士知太原府將使仍鎮鄜延坐斥知軍州明年復知太原此碑立於元豐八年是復知太原時也惠卿小人文與字皆不足存今錄於此者亦楚樛机垂戒之義耳

太師溫國公司馬光墓碑

元祐元年 今在夏縣涑水南原

舊通志哲宗御篆忠清粹德碑額翰林學士蘇軾奉勅撰并書在鳴條岡溫公墓前紹聖初章蔡謀發公隧哲宗以許將言不從止令仆所立碑碑仆之頃大風走石郡吏莫敢近獨一匠奮斤前擊忽仆碑下死遂瘞其碑

惟御篆額尙在皇統中忽生杏樹一株於碑座龜趺之側虬枝蟠屈周映交護邑令王廷直謁墓驚歎其異因出斷碑於深土已分爲四并其額趺共六石嵌壁間而未及別鑄至明嘉靖三年侍御朱寶昌乃選石摹刻重立墓所已非蘇公遺蹟矣今土人猶呼爲杏花碑

修墳記

元祐元年 舊在夏縣溫公塋

志略溫公孫司馬富撰文略云十月甲午掘墳發陝解蒲華四州卒穿土復選上方百工爲喪具十二月丙戌墓成凡用一萬八千九百三十三工蓋比初計減九千九百三十八工又曰易石門以柏而撤儀柳不用不踰時而工就

忠清粹德樓記

元祐二年 溫公孫司馬柱撰舊在夏縣溫公塋

孔子畫像碑

元祐三年 今在高平縣

高平縣志奉議郎權知高平縣事張持撰並書按記云
吳道子畫孔子爲魯司寇像二本乘車而羣弟子從者
謂之圖立而顏淵侍者爲小影司門郎中王伯瑜傳小
影於仙源孔氏蓋孔子四十七代孫襲封衍聖公蒙之
所藏也刻棣州學中高平建學做州像摹於廟壁古今
聖像獨此爲真案此碑文水壽
陽並有摹刻

真如院佛殿碑

元祐三年五月 今在潞城縣南垂村

潞城縣志碑爲柏谷山人劉光撰安定皇甫闕書住持

僧講圓覺經沙門繼深立

介神廟詩碣

元祐四年 月 今在介休縣西關

介休縣志介子推廟在縣西門外有河東路提點刑獄
權發遣張商英詩刻詩七古行書

真容院碑

元祐四年 今在定襄縣東鄭村

舊通志唐打地和尙隱此大厯十三年化門人建塔葬
之元祐中張商英新其院並撰碑記

伯夷叔齊墓碑

元祐六年 黃庭堅撰並書文勛篆額今在永濟縣

石墨鐫華碑稱夷齊之不立必其宗與國人不說者又

云二子之事孔孟之所不言不足信宋人迂謬之談往往如此

清微觀碑

元祐七年 今在浮山縣西北五里

清虛觀碑

元祐七年 今在平遙縣下東門內

平遙縣志權均州軍事判官謝悰撰太廟齋郎朱處厚書道士武太文立石

天王堂碑

有陰

元祐七年七月 今在澤州府

鳳臺縣志在南關古神銳營進士馬泰撰書指揮韓秀建書文俱佳而殘落不可讀其碑陰記神銳第二十指

揮副指揮管兵員四百五十人軍員左右十將都頭副都頭等考宋兵制營設指揮一人副指揮一人管兵五百人所謂第二十指揮蓋統澤州宣毅三營神銳二營威果三營永新招收保節勁勇宜勇各一營言之也每軍有軍使步軍曰都頭三人副兵馬使步軍爲副都頭二人十將者左右承局虞侯押官各二人其節級陣頭教頭則十月上閱教習訓練人也指揮使各營於其州以都巡檢司統之

壽陽縣新學記

元祐七年 李毅撰知縣張元醕立石今存

韓昌黎夕次壽陽驛詩碣

元祐八年 今在壽陽縣太安驛

志略詩云風光欲動別長安及到

集本作春半

邊城特地寒不

見園花兼巷柳馬頭惟有月團圓後有跋謂公使鎮州過此而作並記宣撫王庭湊事元祐癸酉宣義郎知縣孟天常勒石按此詩集本題目夕次壽陽驛下尙有題吳郎中詩後六字釋詩意亦是流連情景消遣旅懷之作乃茗溪漁隱叢話載唐語林云退之侍姬二日絳桃曰柳枝皆能歌舞初使王庭湊至壽陽驛絕句云云蓋寄意二妹也逮歸柳枝踰垣遁去家人追獲故鎮州初歸詩云別來楊柳街頭樹擺亂春風只欲飛惟有小桃園裏在留花不發待郎歸自是專寵絳桃矣竊意公當日忠義激發銜命請行滿朝皆爲公危至有可惜韓愈之語而公慷慨就道毫無繫戀是其公而忘私卽身且不顧而何至眷念二妾至形

山西通志卷之九十四 金石記 三
之吟詠哉大抵後世好事之徒最喜於古人語言文字之
問強索瘕垢創爲異說以聳人聽而不復顧其情事之安
否如昌黎此謗與杜工部不詠海棠同一類也今太安碑
亭中多後人步原韻題詠之作至有以絳桃事命意者殊
失輕薄宜剗削之勿令爲我公累也

后土祠太甯殿記

元祐中 舊在榮河縣

志略眞宗有事汾陰有黃雲隨天書輦詔改奉祇宮爲太
甯宮又治睢上后土廟上額爲太甯正殿元祐中慶成軍
使楊照重修撰記

天齋聖德廟碑

元祐中 齊仲馳撰今在沁源縣縣上鎮見縣志

麓臺山銘

元祐中 張商英撰今在祁縣東六十里見縣志

紫巖山寶峯寺

元祐中 張商英撰范子奇書今在襄垣縣西五十里見

縣志

隋將宋老生墓詩碣

元祐中 張商英撰今在霍州北二里老生墓前

謹案商英倭佛按部所至名山叢林多有留題入相

後一時釋子猶踵門乞文其見於方志者率不詳為

何時作姑列入元祐中以俟考

重修靈顯王廟碑

紹聖二年 舊在潞城縣微子嶺

潞城縣志邑人張山撰紹聖甲戌四月十二日知潞城
縣谷大用立石

壽陽驛記

紹聖二年 今在壽陽縣

志略在太安驛紹聖乙亥秋九月河東節度推官劉仲适
題額壽陽令孟天常書主簿楊旦縣尉趙日進立石潞州
司戶參軍張山撰文

玉兔寺鐘樓碑

紹聖三年 今在浮山縣

志略紹聖丙子十月己亥朔十五日辛未黎陽衛京撰修
造主持沙門義隆立石

太安寺碑

紹聖三年 今在芮城縣南十里太安村

芮城縣志安昌進士劉覺撰治平三年詔諸寺無額者
院僧修葺至三十間準勅存留仍得陳乞寺額寺僧自
懷修建如式熙寧二年詔名壽聖進士李本題額

賓適亭記

紹聖四年 張畢撰舊在屯留縣城西北隅見縣志

成湯廟碑

紹聖中 今在陽城縣

陽城縣志縣令張之才去官有辭湯廟詩邑人溫光刻
石

謁李衛公神祠記

元符元年九月 舊在潞城縣微子嶺

潞城縣志副使呂升卿撰升卿惠卿弟宋史惠卿傳言其為侍講無學術據此碑知其嘗官河東轉運副使

加封明靈公碑

元符二年 今在臨縣南七十里郝家塔

舊通志神姓趙氏宋元豐四年帥臣孫永因祈禱有應

奏封明靈侯元符初征西夏進築堡寨有神助河東路

經略安撫使林希特奏加封明靈公原按云五代時趙

事晉高祖為翰林學士承旨戶部侍郎同中書門下平

章事拜中書令出為晉昌軍節度使開封尹契丹滅晉

從北行沒於幽州其子護喪南歸經此宋將西征禱應

克捷碑元符二年十月右正議大夫守左丞蔡金紫光祿大夫守左丞僕射陳立

謹案宋史地理志元符二年於葭蘆置甯晉軍知軍

領嵐石路沿邊安撫使軍治在今臨縣黃舊志所云

築堡寨者蓋卽此據宰輔表是年尙書左丞爲蔡抃

左僕射則章惇也而舊志不著其名又易章姓爲陳

蓋其碑實刻當時尙書省牒西征禱應克捷當是牒

中所敘奏請之詞而於章蔡結銜並書散階以示推

崇當亦林希所爲愴人之行其氣類蚤相合也

後梁青蓮寺牒準土地記

元符二年 今在鳳臺縣硤石山

鳳臺縣志碑前書澤州牒準硤石山青蓮寺僧依元大

師署狀立本寺常住土地記中列地畝坐落界址後書

開平二年九月三日李典爲缺牒元符二年閏九月日

主僧重立石蓋牒準於梁太祖開平戊辰石刻於宋哲

宗元符乙卯也考戊辰爲晉稱天祐之五年二月梁主入澤州以攻潞五月爲李存勳所敗梁將康懷英以百騎遁歸是時晉攻梁澤州與徐懷玉戰於隧中不能克此年九月梁猶牒勅硤石山則天祐六年澤州屬梁五代史晉取澤州莫考據開元鐘記及楊郡君詩刻崖見摩晉有澤州當有天祐八九年間

聖母廟碑

建中靖國元年 今在平順鄉三池里

潞城縣志碑前書大都督府潞州潞城縣聖母仙鄉重修之廟撰文人進士張孝先後書建中靖國元年正月潞州防禦推官知縣事晁明之主簿劉宗和縣尉唐錫按碑文駢麗中有云此是大唐時未遇衛公投宿之所

得聖母重賜之筵駕祥雲闕大虛之天興雷雨滌中華

之國蓋以其地為卽衛公行雨所宿之龍宮也案唐小

射獵山中宿一朱衣家夜半叩門急一婦人謂之曰此

龍宮也帝符行雨二子皆出欲奉煩何如命乘驄馬繫

一小瓶戒曰馬踐地嘶鳴取水滴馬鬃上一滴水三尺

慎無多也既而雷掣雲間連下十餘滴是夕平地水三

尺云云今縣西有起雲臺亦記衛公事良由潞地高亢

得雨為難故鄉俗廟祀最殷雖事屬悠謬亦有為而為

也

柏谷寺倡和詩碣

建中靖國二年 今在潞安府東山

長治縣志行書前列河東轉運使尙書郎中王舉元五

律詩一首嘉祐壬寅歲三月二十二日男降授朝散郎

權知潞州軍兼管勸農事兼提舉澤絳晉闕遼州威勝

軍駐防闕糧本城兵馬巡檢事護軍闕紫闕詔恭書朝

奉郎簽書昭德軍節度判官廳公事武騎尉賜緋魚袋
喬世澤填諱建中靖國辛巳歲九月一日刻後有通判
軍州事韓標詩一首嘉祐壬寅年三月二十一日按壬
寅爲嘉祐七年舉元偕標同遊柏谷賦詩留題後舉元
子詔知潞州始補刻者故詩後皆備書年月今人自書
先人行狀必使他人填諱其例始見唐徐浩碑謂之題
諱此用之詩刻爲罕見也

絳州思堂記

建中靖國年 今在州治東

志略朝散大夫知絳州軍事兼管內勸農使時恪建堂書
安張繹撰記河南吳儻書

辟雍詔碑

崇甯元年 今在忻州九龍岡

忻州志宋神宗辟雍詔碑在郡舊學址剝碑尙存按詔
中稱神考又云元祐學術悉禁非神宗詔也詔後序書
崇甯元年以徽宗爲正

謹案宋史徽宗本紀崇甯元年七月戊子以蔡京爲
尙書右僕射兼中書侍郎己丑焚元祐法八月甲戌

詔天下興學貢士建外學於國南選舉志外學是爲

辟雍志云崇甯元年宰臣請天下州縣並置學州置

教授二員縣亦置小學縣學生選考升諸州學

州學生每三年貢太學命將作少監李誠卽城南國

外相地營建外學是爲辟雍蔡京又奏古者國內外

皆有學周成均蓋在邦中而黨庠遂序則在國外臣

親承聖詔天下皆興學貢士卽國南郊建外學以受

之侯其行藝中率然後升諸太米元章書蕪湖縣新

學記云崇甯元年仲秋天子思欲推廣神宗皇帝三

舍造士之法詔講議司條具以聞本司奏請縣邑皆得置學者卽其事也當時詔書頒天下爲縣邑置學之緣起必各學皆有之易代之後以其出自蔡京踏毀無迹忻州之碑獨以廢學舊址得倖存耳

李長者行蹟碑

崇甯元年 今在壽陽縣方山

李長者賜號碑

崇甯三年 今在壽陽縣方山

壽陽縣志方山有上寺下寺爲唐李長者通元建下寺名昭化院有僧宗勝撰長者行蹟碑又有勅賜顯教妙巖長者碑

惠應廟賜額勅牒

崇甯四年 今在屯留縣北三里龍潭上

潞安府志宋尙書省牒潞州屯留縣惠應廟文禮部狀承都省批送下河東路轉運使奏潞州申屯留縣古張厚泉龍潭祈禱響應乞加爵號事尋下太常寺勘合當據本寺申檢准本寺令節文諸神祠應旌封者先賜額合取自朝廷指揮奉勅宜賜惠應廟爲額牒至准勅故牒崇甯四年二月日牒中大夫守右丞鄧大中大夫守左丞何司空左僕射其所謂右丞鄧者鄧洵武左丞何者何執中司空左僕射不著姓者蔡京也是時文武恬熙權佞當國其君臣日從事於虛無祈禱詔黷鬼神此亦亂亡之兆也錄之見宋時文牒之制且可徵當日國是云

淨影寺山場碑

崇甯四年 今在鳳臺縣東南九十里蟠龍山

鳳臺縣志藍田縣知縣黃燦飭令所官王之道書崇甯
乙酉三月一日青蓮寺僧鎖巒赴淨影開座說法畢因
訪墨法師遺迹清查山場立石

廣教寺詩碣

崇甯四年 今在聞喜縣寺頭村沙渠寺

惠應祠碑記

崇甯五年十月 許尙忠撰今在屯留縣見縣志

永澤廟碑

崇甯五年 今在汾陽縣西北馬跑泉潤濟侯廟

汾陽縣志碑敘知州許天啟禱雨有應請賜廟額從事

耶權州學教授倪登記將仕郎司法參軍吳以書

昭化院詩碣

崇甯二年 今在壽陽縣方山下寺

志略刻邑宰員逢源詩前序云雪中遊昭化院謁唐華嚴
新賜號顯教妙嚴長者時雲霧蔽山不遂眺望特松雪可
愛留二詩於壁時癸未十一月上休日也

懸泉寺碑

崇甯中 今在陽曲縣西北六十里北崖頭村見縣志

二仙廟碑

大觀元年 荀顯忠撰在鳳臺縣山頭里見縣志

大觀聖作碑

大觀二年十月 一在襄垣縣學一在繁峙縣故城一在

孟縣學

金石萃編按大觀聖作碑聖作猶言御製也歷城縣志金石考云大觀碑山左學宮往往有之蓋通天下皆立者蔡京題額曰大觀聖作之碑以御製爲聖作猶以公主爲帝姬也其以此碑文頒之郡縣加以尙書省牒而別題額曰御製八行八刑條制其實與聖作碑同也按宋史選舉志大觀元年三月甲辰詔立八行取士科詔詞大意與碑同然品目既立有司必求其迹以應令遂有牽合瑣細者自元祐初經明行修科主德行而略辭藝間取禮部試黜之士附置恩科當時故已咎其無所甄別及八行科立則三舍皆不試而補往往設爲形迹求易名格相應於是兩科相望幾數十年乃無一人卓然能自著見者而八行又有甚敝蓋

後世欲追古制而不知風俗教化之所從出其難固如此
據史文知入行入刑在當時固已行之久矣碑云頒之校
學史志則云頒之學授校學似學校倒文學授或又學校
之誤也末云鄭居中奏乞以御筆入行詔旨摹刻於石立
之宮學次及太學辟廡天下郡邑考宋制學校但有國子
學太學其辟廡一名外學乃崇甯元年所建以處天下貢
士別無宮學之文據文獻通考外學旣成增博士十員正
錄五員充學諭者十人直學二人俟貢士至爲之置諸王
宮大小學教授立考選法據此則當時自有諸王宮大小
學而制未詳也玩碑文先立於宮學次及太學辟廡又次
及天下郡邑則宮學在太學之上矣

志略孟縣大觀碑在文廟東廡前古槐下高幾兩尋正文

剝落不存一字惟碑下左方列銜及臣蔡京奉勅等字尙存碑陰有元達魯花赤討不花等重豎此碑跋亦漫漶不完元常遺迹存者絕少以後世惡其人多毀棄之也此碑正文全滅而京之名獨著若故留以待後之指摘者

繁峙縣志碑在舊城內作二截通高丈許石麤惡文漫滅過半據江甯金石記偃師金石遺文記二書校錄之宋史徽宗記大觀元年三月甲辰立八行取士科今碑所言八行及三舍之制並較史爲詳

長治縣志案元宋渤潞州學田記云上黨學舍燬於兵余三十年前見之惟存大觀聖作碑賜辟廡詔轟然二石對峙於應門之前是此碑元末尙存其類沒不知在何時碑固天下郡邑所同立而徽宗龍潛時又嘗節度

是州不可不著也今府屬惟襄垣學故石尙存而文字復多缺泐因取金石箸錄諸書校補於篇其辟靡詔則無徵矣

魏釋曇始禪師行狀碑

大觀二年 今在陽曲縣西三十里虎狼山怡平寺見縣志

保州刺史高繼嵩墓碑 有陰

大觀二年 王邈撰今在霍州庫拔村

謹案繼嵩卒於康定元年以慶厯七年葬霍邑永泰鄉碑爲其從孫恂所追樹故碑陰刻子孫譜系甚備撰文之王邈臨汾進士故自稱爲鄉里後進繼嵩以父定國軍節度蔭由殿直累知軍州碑所述事蹟如

爲晉隰州巡檢用方略捕殺強賊史胡子在瓊州平吐蕃之叛知慶州定戍卒之變其事皆不見於史又稱其遷保州最爲范文正韓魏公所知力薦引之則韓范之經營西夏正其卒之年也

析城山謝雨碑

大觀四年 縣令許奉世撰今在陽城縣

義門趙氏勅命碑

大觀四年 今在保德州柏森村

保德州志朱趙甯自始祖至甯十世不分居家眾五百餘口治平二年詔賜米絹并旌其門號其都爲義門大觀四年子戶部尙書趙演翰林學士趙惠諫議大夫趙岳姪兵科給事中趙戩將勅命刻石

待濟亭記

政和元年正月 今在芮城縣署

芮城縣志待濟亭在縣東三十里涇津渡北岸王村朱縣令邵伯溫建石記移縣治廳壁

謹案宋史道學傳伯溫字子文洛陽人康節處士雍之子也累官永興軍鑄錢監徽宗卽位日食求言上書數千言出監華州西嶽廟久之知靈寶縣徙芮城記稱子頃攝事茲邑今再承乏其攝事當在官靈寶時建屋河壩令涉險者有庇特居濟之一端今亭廢而碑存以人重也

樂氏二真人封號碑

政和元年 舊在壺關縣神郊村

謹案碑爲通仕郎知壺關縣李元儒撰文稱大觀三年七月旱禱於真澤祠其應如響於是請於府丐奏仙號府以事上之漕臺旋蒙保奏如縣所請俞旨太常定議越政和辛卯四月丙辰勅封二女真人之號長曰沖惠次曰沖淑又稱比於祠之東南幽谷間曰櫻桃掌得真人父母之墓其碣乃乾甯甲寅所作云云是唐碑自北宋末已顯於時而金元諸記願尅徵及方志亦錄此遺彼皆不可解

政禪師行蹟碑

政和三年 今在壽陽縣方山下院

壽陽縣志知縣郭瑗撰師姓羅氏平晉人講華嚴經年七十一自刻死期作頌而逝得舍利一千粒

喬澤廟碑

政和元年 今在翼城縣南絳高山

翼城縣志廟在翔皋山乃翔山灤水之神也宋大觀四年邑令王通請於朝賜額喬澤之廟政和中邑令田頌重修有記

加封析城山神勅

政和六年 今在陽城縣南七十里

陽城縣志成湯廟在析城山上宋熙甯九年河東旱通判王任禱雨獲應上言其事詔封山神為誠應侯宣和六年加封嘉澗公勅書勒安廟壁上

紫圍山三十六景詩

政和六年 王宋撰并行書今在壺關縣學文昌祠

潞安府志王輔道紫園詩碣自跋云紫園勝賞聞之舊
矣壺關大夫俾圖作記欲得余詩余時在管城錦繡潭
上自食至晡三十六景賦之徧點竄一二字耳因以草
卷寄時政和六年九月既望乙巳輔道書郡志云輔道
書字神奇原刻十二石亦以榻本累僧碎之埋於山麓
後人蹤迹掘之止得八石嵌於慈雲寺壁間後止存四
石

壺關續志據府志則順治中知縣朱輔移置學宮時尙
存四石輔嘗修縣志所錄之十六首卽四石也而壘蒼
峯五古完好無闕竟不錄及何耶石不知何時又亡乾
隆辛亥訓導呂天培搜訪僅獲一石因嵌之文昌祠壁
又案案江州德安人甯遠軍節度王韶子也宋史附見

父傳略云案字輔道好學工詞章登第至校書郎忽若有所覩遂感心疾惟好延道流談丹砂神仙事得鄭州書生託左道自言天神可祈而下下則聲容與人接因習行其術外間謔傳浸淫徹禁庭徽宗召見約某日卽內殿致天神及日案與書生至東華門闢卒獨聽案入帝齋潔敬待越三夕無所聞乃下案大理獄成棄市人但詫其詩字神奇而不知其立身始末如此備詳之可爲才人放誕之戒

二仙廟設立祭器碑記

政和七年 今在鳳臺縣

鳳臺縣志記頗簡淨後書政和七年丁酉歲四月十七日末署鄉貢進士杜自修

武安王廟碑

政和七年 今在聞喜縣西關

河津廳事碑

政和八年 今在縣署鄧侯祠

河津縣志此碑勅下監司守令由中書省伐石置之廳

事碑分上下截字完好案志標目為政和八年碑

敷應侯廟碑

政和中 今在武鄉縣東南龍泉上

武鄉縣志廟記知縣張剛撰乃舊龍泉神崇甯中賜額

仁濟大觀初封爵秩曰敷應侯

棲巖寺碑

政和中 今在永濟縣東南二十五里

永濟縣志碑陰有安奐大字

超山應潤廟勅牒

宣和元年 今在平遙縣

平遙縣志勅賜超山應潤廟牒大書通議大夫守右丞
張特進少宰少保太宰俱行書下各有押

謹案牒文列銜守右丞張者張邦昌也特進以下官
不書姓未知爲一人兼銜爲兩人專銜考是年當國
者蔡京余深王黼京久進太師矣據宰輔表是年正
月加少宰者王黼也以少宰少保進太宰者余深也

超山應潤廟記

宣和元年 今在平遙縣

平遙縣志宣教郎知汾州平遙縣勾管學事余彥和撰

太學內舍生龍澤書字體方整可觀

超山應澗廟祝文

宣和元年 今在平遙縣

平遙縣志奉訓大夫周焯遣官余彥和致祭刻一方碣

字體雅媚 案文後有宣和二年張標跋

澗濟侯廟碑銘

宣和元年 今在汾陽縣西北白彪山麓

汾陽縣志永澤廟宣和元年封澗濟侯碑銘知汾陽軍

事周焯撰

重修湯王殿宇記

宣和元年九月 劉詠撰今在鳳臺縣大陽鎮見縣志

徽宗御筆手詔石刻

宣和元年 今在岢嵐州及潞安府 又平定州一碑宣和六年立

志略徽宗時有瑞鶴之應詔天下刻石紀事額名御筆手詔在岢嵐城內居仁街宏福寺前西壁漫漶不可讀一名神霄玉清萬壽宮碑在平定州下城獅子巷西五嶽行祠長治縣志神霄宮御筆手詔行書在天王廟元至正中道士某所摹刻書最工刻手亦佳

湯王廟芝草詩序石刻

宣和二年 今在鳳臺縣大陽鎮

鳳臺縣志進士劉泳序並泳七律其族人劉衍和韻進士劉昇書宣和庚子九月十一日木芝本無足奇今孔林歲生數百本以爲常蓋菌之屬也近聞劉氏後裔尙

藏之爲世寶焉

長者龔記

宣和二年 今在壽陽縣方山下寺

志略碑末書政和戊戌十月望日觀文殿大學士張商英
題付宗悟朝請大夫直秘閣權發遣河東路計度轉運使
陳知質宣和庚子七月刻

絳州潛心堂記

宣和三年 知州李皓撰今在州署

封靈潤公勅

宣和四年四月 今在武鄉縣南龍泉祠

潞公軒記

宣和中 今在翼城縣

舊通志卽河亭宣和中縣令李元儒記潞公治翼修河亭於應事之後親書歲月榜於屋楹後更以國爵名軒自天聖六年戊辰越政和七年丁酉凡九十年矣閱歲雖多其蹟尙完謹勒於石以不朽

東園記二碑

宣和中 今在翼城縣

舊通志在治東北縣令向淙所闢邑人丁彥師撰記園內阜民應縣令李察建亦丁彥師記

邢昂墓詩刻

舊在陽曲縣天慶觀

不詳年月以下同

志略邢昂墓在太原縣晉祠南原上昂高蹈不仕張景儉表其墓寇準文彥博陳堯佐范仲淹等十四人皆贈詩刻

石太原縣志石刻後移陽曲天慶觀中今毀

昌甯公廟碑

舊在太原縣南十里

太原縣志卽汾水川祠員外郎掌禹錫撰案禹錫宋史有傳碑文見

舊通志注失名而古蹟卷又作張禹錫撰謬

明仙寺詩碣

蘇過書舊在太原西南十里龍山見縣志

虞部員外郎許孝恭墓碑銘

孟楷撰舊在曲沃縣高顯鎮見縣志

左武衛大將軍史緒墓碑銘

王居正撰舊在曲沃縣東常安村見縣志

鄉貢進士甯智墓表

王慶叟撰舊在曲沃縣東望絳村見縣志

共世子廟碑

吳勉之撰舊在曲沃縣見舊通志

御史裴瑾墓碑

今在萬泉縣北二里

舊通志碑文剝落額云命官故右補闕裴公神道

寶峯寺詩刻

李伯曾撰今在襄垣縣西紫巖山

關將軍廟碑

今在平遙縣東十五里冀郭村

舊通志張天覺撰在慈相寺山門外題云荆南玉泉關

將軍廟記

玉皇行宮碑

馬祥撰今在陵川縣下壁村見縣志

晉州兵馬都監馬輝墓志

學正靳榮撰今在遼州城西見舊通志

陽光洞碑

在靜樂縣東門外天慶觀後

舊通志憲州尉杜思亮撰道士閻若進書

闕道甯遺頌碑

舊在代州南鳳凰山觀中

舊通志觀一名來儀觀宋闕道甯號休休子養真於此
年八十尸解有遺頌并志今剝落

順應侯廟碑

王崇極撰舊在代州北句注山神祠

南神廟碑

在五臺縣南十里

五臺縣志南神壙小山圓突特起上有漢文帝祠相傳文帝王代時遊獵至此宋進士孫儼有修祠記

諫議大夫司馬康墓志

范祖禹撰今在夏縣晁村見舊通志

佛峪寺碑

在稷山縣西北二十里見舊通志

張喬撫琴圖詩

今在稷山縣城隍廟見縣志

韓隱君詩碣

今在稷山縣塢堆村

稷山縣志土人於塢堆掘得石碣上刻石曼卿上韓希祖隱君詩及李繼中贈昌黎韓山人初構嵩陽小隱詩並五言律又上谷成顥送韓隱君七律一首

廣勝寺詩碣

今在霍山上寺

舊通志寺有宋李曼王筍王淵亭藍諫攀張傳新若通曹量及元麻秉彝詩

右宋碑碣

山西通志卷九十四